

緣督廬日記鈔

葉昌熾

撰

王季烈

編

③

第三冊目錄

卷九	光緒二十七年（一九〇二）	一
卷十	光緒二十八年（一九〇二）	七三
卷十一	光緒二十九年至三十年（一九〇三——一九〇四）	二四一
卷十二	光緒三十一年至三十二年（一九〇五——一九〇六）	三九七

緣督廬日記抄卷九

辛丑全年

長洲葉昌熾著

邑後學王季羣輯

辛丑正月

元旦臨金經一葉西眺長安南瞻鄉國 六飛未返三徑就荒
宗祧之計闕然俟河之清無日犬馬之齒五十有三矣桑榆
之補尚待何時邪靜言思之百感交集

初二日錄會昌四年金谷原李氏塋幢一通往年新正三日賀
刺闡門今年空谷之中足音寂然惟鄂教士以一刺來其徒
五人亦來先施禮無不答即投刺謝之昌平居停謨罕默德
教也今與基督為鄰忠信篤敬可行蠻貊况均為率土之民
乎閉關謝客適致開門揖盜講學諸公誤於尊攘放距其禍
如此其烈可不悲哉

初三日佩鶴書來並示元日七絕詩四首其佳句有云家家競把桃符換不重書春重紀元忠愛之忱溢于言表錄大和八年義成軍押衙田任經幢一通

初四日訪經士適昌平趙靜瀾來云德人至延慶州勦團匪首馬子和亡命未獲縱兵淫掠勒索銀十二萬兩富室盡傾家昌平懷來亦皆遷徙一空德兵每至一鄉鎮縱馬隊兜圍以步兵入內窮搜少艾無得免者教化之國果如是乎經士云得賢良寺信莊邸天水尚書英總憲皆於小除夕賜自裁毓賢廿六日正法並聞此間啓徐兩公即日赴西市誤國至此一死不足蔽辜展翁不與五君子同盡卒致狐貉一邱亦不能為賢者諱也罪人斯得言歸於好回鑒有日未始非不幸之幸但北人執迷不悟街談巷議依然如醉如狂杞人

之憂仍未能稍釋耳又訪佩鶴知張幼樵文有 旨起用賞
編脩桐緣奏保兩湖書院山長梁鼎芬經心書院山長吳肇
泰皆賞還原銜

初五日錄長慶四年好時縣七祖院幢經一通

初六日錄唐經幢殘石一通棲霞舍利塔佛偈一通無年月舍
利塔佛號一通閔邱抄正月初三日奉上諭 此紫褐首除
載勛已賜令自盡毓賢即行正法外載漪載瀾均定為斬監
候罪名惟念誼屬懿親特予加恩發往極邊新疆永遠監禁
即日派員押解起程剛毅情罪較重應定為斬立決業經病
故免其置議英年趙舒翹已定為斬監候着即賜令自盡派
陝西巡撫岑春煊前往監視啟秀徐承煜各國指稱力庇拳
匪專與洋人為難昨已革職着交部李鴻章照會各國交回

即行正法徐桐輕信拳匪貽誤大局李秉衡好為高論固執釀禍均應定為斬監候惟念臨難自盡業經革職撤銷卹典應免再議欽此爰書已定回鑒之期當不甚遠聞啟尚書徐侍郎本於今日赴市曹因合肥相國生日停刑一夕苟延聊盡同官之誼然不如慶邸之忠告也相傳啟尚書喪母慶邸不弔而賀問何賀則告之云賀君忠孝兩全正在此時機不可失啟不省慶邸默然遂罷

初七日同鄉陳敬庵指揮文熙介經士屬題江亭賞月圖作五絕三首錄雲居寺進寺主靈塔一通元大德十一年神通寺寶公塔銘一通

初八日再韓經士招茗飲叔後第一次小集欣然願往及驅車出宣武門但見洋人怒馬而馳兩旁觀者如堵牆知為啟徐

兩君正命之期急命御者從鐵門出繞果子巷折而西車中
俯仰今昔慘然不樂積有滿前不復能知味矣戊戌所殺者
除楊侍御外皆南人也今皆北人戊戌皆漢人今除天水尚
書外皆旗人也戊戌皆少年新進今則皆老成舊輔反手覆
手頃刻間耳然則今日之禍黨禍也蕭牆縱火以敵人為鑪
鞴耳再韓云吾輩皆閒人也閒人二字簡而有味置身局中
鮮不傾覆可不愍哉歸後錄咸通七年李君佐尊勝陀羅尼
咒一通崇甯元年七日山翟昌香幢一通

初九日錄光化元年果州刺史石幢一通唐終南山石幢一通
宋殘幢一通

初十日錄德化李氏藏幢三通一宋建隆三年造其餘年月皆
殘缺又乾興元年儒教鄉望臺村王榮造香幢一通

十一日錄常山王石幢一通開寶八年靳氏經幢一通

十二日午後游厥肆自聯軍入都舊日書城化為豺虎之窟裹足不前已半載矣今雖輪奐猶新瑯嬛無恙莫不雙扉靜掩門無車轍至翰文齋叩關而入坐憩片時復在厥西門一小肆見元刻真西山文章正宗有古稀天子之寶內府藏書也又胡刻資治通鑑索二十四金較往日之價稍賤矣又見明刻吳才老韻補二十年前以此本屬袁渭漁比部携赴羊城換得粵雅堂叢書一部忽然重見如逢故人簡端朱印尚在據云得之碧琳瑯館方氏此言不謬展卷憮然不忍釋手燈下錄太原郭重顯經幢一通夜卧正欲入寐忽聞屋後人聲雜以斧斯聲邪許聲舂鍤聲缶桶聲墻圻屋倒聲其聲鎮定不驚不虞有他既聞傳言汲水始蹶然驚呼室人起傳鈴

索至門房羣奴盡起出視之則西鄰東廂洋爐烟囱失火先
透屋頂黑烟已直冒矣急起披衣盡室戒嚴幸鄂教士在寓
以兵法部勒救火絲毫不亂約一炊許烟焰漸息故屬僅隔
一牆不踰數武若竟燎原惟有拱手以付一炬昨寫經正值
大悲心陀羅尼啟請有云我若向湯火湯火自消滅百千諸
佛同在一堂甚深經典尚未卒業神天護佑不至遭劫後之
劫幸何如之

十三日訪蓮南歸購得雍里顧氏家集兩種洋一元一為顧潛
靜觀堂集則已有藏本矣一為顧恂桂軒先生集內分永思
錄一卷鰲峯彙五卷百詠天香集一卷西湖紀游詩一卷淡
蔗餘甘詞一卷附斯文會圖詩一卷則皆求之而未得者也
讀邸抄十二月二十二日上諭已革莊親王載勛着賜令

自盡派署左都御史葛寶華前往監視已革端郡王載漪降調輔國公載瀾均着革職發往新疆永遠監禁先行派員看管已革巡撫毓賢前已遣發新疆計行抵甘肅着傳旨即行正法並派按察使何福堃監視行刑前協辦大學士吏部尚書剛毅本應置之重典惟現已病故着追奪原官即行革職革職留任甘肅提督董福祥本應重懲姑念在甘肅素有勞績回漢悅服格外恩施從寬着即行革職降調都察院左都御史英年着加恩革職定為斬監候罪名革職留任刑部尚書趙舒翹着加恩革職定為斬監候罪名英年趙舒翹均着先在陝西監禁大學士徐桐降調前四川總督李秉衡均已殉難身故惟貽人口實均着革職並將卹典撤銷欽此此諭在英趙自裁啟徐正法之前補錄於此此案本末釐然矣

十四日錄中和二年鄭惟幾書幢一通

十五日錄天福七年小靖化坊張敬思墳幢廣順三年殷遇幢
慶厯八年張昭範幢各一通皆洛陽存古閭物也閱邸抄
上諭本年五月拳匪倡亂勢日熾張朝廷以勦撫兩難迭次
召見臣工以期折衷一是乃兵部尚書徐用儀戶部尚書立
山吏部左侍郎許景澄內閣學士聯元太常寺卿袁昶經朕
一再垂詢詞意均涉兩可而首禍諸臣遂乘機誣陷交章參
劾以致身罹重辟惟念徐用儀等宣力有年平日辦理交涉
事件亦能和衷尚著勞勩應即加恩徐用儀立山許景澄聯
元袁昶均看開復原官該部知道欽此

十六日送報人以天津日日新聞報求售姑披閱之其論端剛
跋扈直誅心曲與鄙見若合符節但非小臣所敢私議耳錄

句容經幢題名殘刻一通此拓已丑冬月與崇明寺兩幢同
得于白門旅舍廣狹修短並同其一殘缺僅存六面因以此
一面合之共七面為一通及前年繆筱珊為余拓得崇明兩
幢全分其一尚完好其一雖漫漶八面皆有字跡可辨且末
一面自有題記決無此一面在內始知此為別一幢之殘拓
著錄又增一種沾沾敬帚之事

十八日作七律兩首題吳氏兩世孝子像贊一為彥欽先生一
為菡青先生穎芝之祖考也訪佩鶴途中購得皖南李宗燭
所刻徐騎省集僅兩千文閱邸抄去年五月二十四日以後
七月二十以前所有禍首矯傳諭旨着內閣彙集呈覽提出
銷除以重綸音而昭信史此亦史臣所宜知也聞賠款議增
甲午一半再贏五十萬各省鹽漕釐稅皆歸洋人收納據云

上可不損國下亦不病民但取中飽如外飽何

十九日佩鶴來商應詔陳言管見變法莫先於教中國文理太深六經大義非童子所能曉欲啟牖愚蒙非重輯簡明淺近之書家絃戶誦不可中國人才不振由於所學非所用欲造就人才非變科舉停捐例不可所見未能脗合

二十日錄大和七年華嚴院經幢一通

廿一日錄乾符三年瑯邪王夫人墓幢一通宋河南王師上人幢一通

廿二日錄至道元年杜澤里經幢一通前錄崇明寺兩幢一幢雖八面不開僅有上截無年月題字頃又檢得舊拓殘本一紙僅第二至第六五面下截尺餘經文之下蓮花為座漫刻大中七年十月姚端徐弁重修建與嚴氏江甯金石記所錄

崇明寺幢正合急取兩本對校首尾聯接之處若合符節蓋此舊拓本即為前幢之下截其佚已久故今所拓者僅有上截耳此幢凡先後三拓本校錄三次延津之劍始合疑義亦始渙然冰釋補釋既畢喜誌於此

廿三日錄天寶九年永泰寺經幢一通又無年月唐幢一通先序次經次呪經文合為一篇不分上下經序呪各有標目舛脫異同不可枚舉

廿四日錄天寶十二載永泰寺幢一通

廿五日穎芝招飲見經士云各國將陸續撤兵南城官紳欲在慶邸處遞呈請留美兵官戴麗生在京彈壓吳越同舟至於攀轅卧轍良堪增嘅又聞俄人覬覦東三省各國皆有違言朝廷已有國書往請歸枋可望轉圜又聞岑雲階中丞調晉

撫因歸綏道鄭文欽阿前撫臣毓賢之旨戕斃游歷洋官畏
罪遶颺撫臣錫良事前疏於防範事後未能緝獲英人將以
李代桃也穎芝出黃薨園問梅詩社冊萬承紀繪石十二幀
劉文清與紀文達尺牘共賞

廿八日錄大厯七年八關齋會報德記幢一通

廿九日重錄金元幢六通補釋文字并有刊正行款之處几塵
風葉豈徒校書而已

二月

初一日錄無年月唐幢一通又重錄元無礙清辯禪師塔銘
初二日燈下錄右三部檢法王子春幢一通留牘村甯國寺幢
一通皆大定年造

初三日錄甯國寺張恕石幢一通天慶五年普照寺幢一通

初四日吳麟書來見案頭報章不覺蹙額談及禍首咨嗟合肥之下石吾同年如得志外為疆吏則又一毓左丞內為樞輔則又一剛子良也錄承安二年靈感寺經幢一通

初五日矮估暮來得開元二十三年孫使君造象長慶三年合州刺史口溫口造象審其紙色墨色三巴拓本孫趙兩家及劉燕庭皆未著錄又天寶八載石槽欄頌六面一通大中二年劉元簡買地券天歷二年玄真觀和婆婆功德記又一宋殘碑斷為兩石紀年尚存一景字非景德即景祐也山左物廠肆未敢過刻予以五千文錄禮賢鎮壽峰寺經幢兩通一
乾統年一天慶年

初六日錄正隆三年隱村普照寺經幢一通

初七日錄永清陳家莊延壽寺經幢東安舊州鎮大悲寺經幢